



Sesida dals

Communitgà ils

Protocol nr.

13 da december 2022

15 da december 2022

953/2022

Dumonda Rettich

concernent mesiras dal chantun cunter la mancanza qualitativa existenta e cunter la mancanza quantitativa smanatschanta da persunas d'instrucziun

Resposta da la Regenza

Tenor la statistica da furmaziun dals ultims otg onns davart il svilup dal dumber da scolaras e scholars (SeS) sco er dal dumber da persunas d'instrucziun per stgalim da scola n'ha il chantun Grischun betg en general ina mancanza da persunas d'instrucziun. Entant ch'il dumber da SeS è sa reducì per passa 1000 durant la perioda observada (onns da scola 2013/14 fin 2021/22), è il dumber da persunas d'instrucziun a la scola populara restà praticamain constant. Ins na po pia betg discurre d'ina mancanza qualitativa existenta u quantitativa smanatschanta da persunas d'instrucziun. Senza dubi è la situaziun da recrutaziun s'acutisada per part a la scola populara grischuna, ed en singuls lieus è ella critica. Areguard la remartga che var 400 persunas d'instrucziun n'hajan betg tut las qualificaziuns necessarias en il chantun, stoi vegnir menziunà che 99,8 % da la magistraglia che instruescha en il chantun Grischun, ha terminà ina scolaziun pedagogica renconuschida. Quai è ina differenza essenziala envers auters chantuns. Las persunas d'instrucziun che na possedan betg in diplom renconuschì per il stgalim respectiv u che n'han betg la qualificaziun professiunala specifica, sco er las persunas d'instrucziun senza diplom pedagogic dovran ina permissiun da dar scola da l'Uffizi per la scola populara ed il sport (USS).

Tar las dumondas 1 e 2: La scola populara è – tras lescha – ina incumbensa cuminaivla dal chantun e da las vischnancas. Las suandantas mesiras che duain megliorar la situaziun da recrutaziun da persunas d'instrucziun, èn planisadas u gia realisadas sin differents stgalims da cumpetenza: La Regenza ha incumbensà la Scola auta da pedagogia dal Grischun (SAPGR) da porscher in studi da master «Stgalim secundar I» per persunas d'instrucziun da la scola primara sco er in studi da pedagogia curativa da scola en las linguas chantunalas a Cuira. La SAPGR scolescha actualmain uschè bleras persunas d'instrucziun sco anc mai. Il USS sustegna las scolas tar la recrutaziun, quai cun la plattafurma chantunala da plazzas en l'internet e cun il program BERP (introducziun da persunas d'instrucziun en la professiun). A chaschun da sesidas da quartal appropundescha la partiziun Inspecturat da scola dal USS regularmain cun tut ils purtaders da scola la situaziun da recrutaziun ed il svilup dal personal

en las regions. En il chantun Grischun na vegn il persunal da scola betg engaschè tras il chantun, mabain tras ils singuls purtaders da scola. Sco patruns da las persunas d'instrucziun han els pussaivladads d'agir per meglierar la situaziun da recrutaziun e per augmentar la cumpetitivitad sin il martgà da lavur. Sch'il clima da scola vegn tgirà activamain tras la gestiun da la scola (cussegl da scola e direcziun da la scola) e tras tut tgi ch'è participà a la scola, gida quai essenzialmain che las persunas d'instrucziun han il sentiment da vegnir sustegnidas e ch'ellas sa sentan bain en ina scola. In clima da scola positiv po impedir proactivamain ina midada da piazza u da professiun. Il medem vala per ina infrastruttura da scola attractiva. En il rom dal svilup dal persunal po la gestiun da la scola p.ex. motivar sistematicamain persunas d'instrucziun adattadas – saja quai persunas cun permissiun da dar scola u magistras e magisters che instrueschan sin il stgalim primar – da far la scolaziun per instruir sin il stgalim secundar I. Cun la perspectiva da survegnir ina piazza fixa en cas d'ina scolaziun u d'ina furmaziun supplementara (acquist d'in stgalim supplementar) po la scola stgaffir impuls. Sche quai è pedagogicamain raschunaivel, po la gestiun da la scola adattar il dumber da lecziuns ed uschia ils pensums en il rom da la responsablidad directiva sin basa da l'art. 19 e da l'art. 20 da l'Ordinaziun da scola (grondezzas da las partiziuns). Per organisar l'integraziun sco er per examinar la collavuraziun regionala sin il stgalim secundar I èn responsabels ils purtaders da scola. Pli navant pon ils purtaders da scola fixar pensums minimals, e sur ils contracts d'engaschament pon els reglar – mintgamai per il proxim onn da scola – la flexibilitad necessaria per ils servetschs da las persunas d'instrucziun areguard la dimensiun dals engaschaments. La Regenza renviescha la finala a sia resposta a la dumonda parlamentara Conrad-Roner concernent las persunas d'instrucziun grischunas da la scolina sco exempel per mesiras en il rom da la proxima revisiun parziala da la Lescha da scola.

Tar la dumonda 3: Las mesiras chantunales menziunadas èn realisadas. La Regenza ha surdà a la SAPGR l'incumbensa d'extender la purschida da studi (stgalim secundar I e pedagogia curativa da scola). Il studi cumenza cun l'onn da scola 2023/24. Las mesiras sin il nivel dals purtaders da scola pon vegnir realisadas cuntinuadamain.



En num da la Regenza

Il president:

Marcus Caduff

Il chancelier:

Daniel Spadin